

读库·老课本丛书

共和国教科书·高小部分

新國文教授法

【下】

新星出版社
NEW STAR PRESS

G624

9121(2)

1414063

读库·老课本丛书

共和国教科书·高小部分

新國文教授法

下



校 编
订 纂
高 谭
凤 廉
谦
庄
俞

NEW STAR PRESS
新星出版社

贵阳学院图书馆



GYXY1414063

图书在版编目(CIP)数据

共和国教科书教授法. 高小部分. 新国文 : 全2册 /

谭廉编撰. — 北京 : 新星出版社, 2011.9

ISBN 978-7-5133-0378-1

I. ①共… II. ①谭… III. ①小学语文课—教学参考资料 IV. ①G623

中国版本图书馆CIP数据核字(2011)第173139号

新国文教授法 (高小部分·下)

出版发行: 新星出版社

出版人: 谢刚

社址: 北京市西城区车公庄大街丙3号楼 100044

网 址: www.newstarpress.com

电 话: 010-88310888

传 真: 010-88310899

法律顾问: 北京市大成律师事务所

经销电话: 010-83398809

官方网站: www.duku.cn

邮购地址: 北京市海淀区万寿路邮局67号信箱 100036

印 刷: 北京尚唐印刷包装有限公司

开 本: 645×925 1/16

印 张: 16.5

版 次: 2011年9月第一版 2011年9月第一次印刷

书 号: ISBN 978-7-5133-0378-1

定 价: 82.00元 (共三册)

版权专有, 侵权必究; 如有质量问题, 请与出版社联系调换。

再版整理修订 读库

校	注	陈淑梅
复	审	杨运洋
		朱秀亮
		田巍
审	校	朱朝晖
		杨运洋
特约审校		吴晨光
编务统筹		张立宪
资料提供		石鸥
美术编辑		艾莉
助理编辑		杨雪
责任编辑		罗晨

新國文教授法

【第四册】



第一课 周游世界(一)

本文

余素有周游世界之志。某年夏月，发自北京，乘汽车至天津，易汽船指朝鲜。一日，至仁川。登陆，游汉城。日本所置总督府在焉。由此乘汽车至釜山，登舟向日本。明日，抵马关。又明日，抵神户。皆大商埠。欧美各国人，商于其地者颇众，然皆服日本法权，无租界，无会审。更乘汽车至大阪，工业甚盛。至西京，彼国旧都也。山水明秀，多古迹。又抵东京，则日本之都城矣。遥望富士山，高出云表，虽在盛夏，山巅积雪不消。

居东京数日，至横滨登舟，作美洲之游。船随黑潮之流，向东北，渐寒，遂见雪。由是折向东南，复转炎暑。航行十四日，抵旧金山。远眺街市，有石造大厦，六七层不等。寺院尖塔，耸峙其间。登岸，乘汽车，横贯美洲而东，五日至纽约。纽约者，美国商业最盛之地，市街之南部，皆大商肆，北部则市民居之。复南行，至美都华盛顿。议院、官署，规模宏壮，徘徊其间，景仰不置。

游既毕，至波士顿登舟，渡大西洋。航行八日，过爱尔兰，达利物浦。利物浦者，英国大商埠也，船舶出入，无间昼夜。登岸乘汽车，向东南行，历八小时而达英都伦敦。东部为街市，商业繁盛；西部多贵显、富豪邸第；南部多工厂。泰姆士河有长桥十三，而最著之伦敦桥，在其下游。河底有隧道二，其内遍燃灯火，电车往还，络绎如织。

目的

本课述周游世界之路线及时日，以为游历者之先导。

准备

教员教授本课时，先示以图例，说明其作用，而后画周游世界图于黑板，以备教授时指示。

教授事项

(甲) 时间分配 本课分三时。

第一时 “余素有周游世界之志”至“山巅积雪不消”。

第二时 “居东京数日”至“景仰不置”。

第三时 “游既毕”至“络绎如织”。

(乙) 内容提示

一、游历异邦，当以考察政治、实业、教育为主要，瞻览山水之胜为余事，故文中处处带定工业、商业，略以风景点缀之。

二、甲午以后，朝鲜俨然以独立国自居。不及二十年，已在日本总督统辖之下。可知不能自立而借人以为重者，自速其亡而已。

三、欧美人商于日本者，皆服日本法权，此即所谓有完全之主权也。我国土地，较日本大数倍，反有租界、会审，可耻孰甚。

四、河底而有隧道，足见建筑之进步，更足征地方之繁盛。

三 (丙) 文字应用

课文为记事体，分三段。第一段首句，自述有远游之志；次四句，记启行之年月及发轫之地点；次五句，记至朝鲜而游汉城；次七句，记自釜山抵马关、神户；次五句，言日本有治外法权；次二句，记大阪之工业；次四句，记西京之风景；次六句，记东京之风景。第二段首三句，记自横滨而作美洲之游；次八句，记海中之寒暑，及航行之时日；次五句，记旧金山之建筑；次四句，记乘汽车至纽约；次五句，记纽约商业之盛；次六句，记华盛顿议院、官署之宏壮。第三段首六句，记自波士顿至利物浦；次四句，记利物浦商业之盛；次三句，记自利物浦达伦敦；次四句，记伦敦商场、邸第、工厂之分立；次三句，记泰姆士河之伦敦桥；末四句，记隧道内之情形。

参考

【朝鲜】在我国东北朝鲜半岛上，昔为独立国。民国纪元前二年，为日本所合并。

【仁川】在朝鲜京畿^①道西南，其地为汉城之咽喉。

【汉城】为朝鲜旧日之京城，在汉江北岸。

【日本所置总督】统治朝鲜全境者，犹英之印度总督然。

【釜山】在朝鲜庆尚道东南，有绝影岛横其前。

【马关】在日本本州岛之西南角。

【神户】在畿内（在本州中央）大阪湾北岸。工商之业，与横滨并称。

【皆服日本法权】昔日欧美人之居日本者，亦归己国领事保护。自日本刑律改良后，始与各国改订对等条约，裁撤领事裁判权。无论何国，均受治于日本法律之下，故云服日本法权。

【无租界无会审】我国之通商口岸，以其地租于外人，谓之

① 畿：jī，旧时靠近国都的地方。

租界。租界中有会审公堂，华官与西官，会审中外钱债词讼一切交涉案件。各国人既服日本法权，故无租界，无会审。

【大阪】在畿内大阪湾之东，工业商业之盛，推为西南第一。

【西京】亦在畿内，为古时帝都所在，故称京都。明治二年，乃徙都东京，铁路四达，交通便利。

【东京】在东海道东京湾之北岸，为日本现在之京师。

【富士山】在东海道之中央，为日本名山，冬夏积雪，风景绝佳。

【横滨】在东京西南，当太平洋航路之要冲，商务之盛，推为全国第一。

【黑潮】暖流之名，呈暗蓝色，起于斐律宾群岛，经台湾之东，过日本东南海，折向东北，至北美洲西岸，复南转而合于北赤道海流。

【旧金山】一名三佛兰西斯科^①，属美国加利福尼亚省，为太平洋第一要埠，夙以产金名于世，故名金山。后因为产额不及澳大利亚，故称澳为新金山，此为旧金山。

【纽约】为美国第一大会，滨大西洋，属纽约克省，前有琅岛遮绝风涛，不啻天然之堤岸。

【华盛顿】为美国之都城，在可伦比亚区波多麦河左岸，有华盛顿之记功坊在焉。

【波士顿】为麻沙朱色得士首府，不特工商业兴盛，又为文学美术之中心。

【爱尔兰】为英吉利三岛之一，在英格兰之西。

【利物浦】即丽佛普尔，在英格兰西北马尔塞河口，为英吉利第二大城。

【伦敦】英之京城，为世界大都会之一，并操世界贸易之中

① 现译圣弗朗西斯科。

权。

【邸第】邸，音底。古者诸侯朝天子至京师，所宿之舍称邸。邸，至也。又天子赐诸侯住宅曰第，言其有次第也。

【泰姆士河】即达迷塞河，发源于西部丘陵，横贯南部，东流入海。

【隧道】隧，音遂，掘地通路曰隧。伦敦居民稠密，故于地下通隧道以便行人。

第二课 周游世界(二)

本文

由英国南海岸乘汽船，渡海峡，历二小时，易汽车抵法都巴黎。其市街之华丽，称欧洲第一。周围炮台密布。府中街市繁盛，楼阁参天。其西之公园，平地广场，有喷泉，有高塔，风景颇为壮快。道旁列植树木，中央有大道，车马往来，有流水游龙之视。

由法国乘汽车东行，一日，至德京柏林。市肆壮丽，不如巴黎，商业繁盛，不如伦敦。然人民嗜学，风俗朴素，为欧洲冠。国中多工厂，以克虏伯为最，役工匠至数万焉。

由柏林东北行，赴俄罗斯。二日，至圣彼得堡。盖以彼得大帝之名，名其都城也。由此南行，至旧都莫斯科。有礼拜寺，庄严华丽，凡新君即位，必于是中行加冕礼焉。由莫斯科东行，入亚洲境，经西比利亚，以达哈尔滨。汽车所过，高山大湖，则凿洞架桥以通之，其工程之浩大，实为可惊。自圣彼得堡至哈尔滨，凡十二日。更南行，经吉林奉天，一日以达营口。又西行，复归北京。时已冬令矣。

是役也，环球一周，费时五月，而游观都市之日为多。途中所经行者，海道几三万里，陆道几五万里，而费时不过五十日。

甚矣，交通之便利也。

目的

本课述周游世界之归途，不由故道。

准备

画欧亚略图于黑板，指示归途之路线。

教授事项

(甲) 时间分配 本课分三时。

第一时 “由英国南海岸乘汽船”至“役工匠至数万焉”。

第二时 “由柏林东北行”至“交通之便利也”。

第三时 复习全课。

(乙) 内容提示

一、巴黎以豪华胜，伦敦以商业胜，柏林以学术工业胜。我国若奉以为法，则效法于法，不如效法于英德。

二、俄人于荒凉之西伯利亚，建筑铁路，不恤巨款，急迫竣工，其抱绝大之希望可知。

(丙) 文字应用

课文为游记体，分四段。第一段首四句，记自英国抵法都巴黎；次五句，记巴黎守备之严，市街之繁盛；次九句，记巴黎公园中布置之精，及游人之多。第二段首三句，记自法至德京柏林；次四句，记柏林不如巴黎、伦敦之处；次三句，记柏林之学术为欧洲冠；次三句，记克虏伯厂规模之大。第三段首四句，记自柏林至俄京圣彼得堡；次二句，记彼得堡得名之故；次六句，记莫斯科为俄皇行加冕礼之所；次四句，记自莫斯科达哈尔滨；次五句，记西伯利亚铁路之工程；次二句，记自圣彼得堡至哈尔滨之时日；次三句，记南行达营口；次四句，记西行达北京而时已冬令。末段十句，言行程不过五十

日，足见交通之便利。

参考

【海峡】即英法相隔处之多维尔海峡。

【巴黎】见第一册二十四课。

【炮台密布】巴黎城外，环以炮台，共有十八座。

【喷泉】用铁管通泉，激之上喷，自高泻下也。

【柏林】地跨中央平原史普里河之两岸，为世界学术之中心。

【克虏伯】炮厂之名。创造是厂者，为克虏伯爱耳弗雷，克虏伯其姓，爱耳弗雷其名也。德国爱生城人，生于一千八百十二年，卒于一千八百八十七年。其父在本城设一小铁厂。父死，爱耳弗雷年幼，其母主厂事。及长，以其所造枪赴伦敦赛会，大获声誉，其业日振，称为炮王。近年德国军备日张，皆由是厂所供应，日佣工人四万余。一千九百零八年，全厂已值英金九〇、〇〇〇、〇〇〇镑。

【圣彼得堡】扼芬兰湾之咽喉，为商务及用兵要地，西伯利亚铁路发端于此。

【莫斯科】居全国之中央，为陆路通商之要点，故虽经残毁（拿破仑征俄时俄人设计焚之，全城化为焦土），今建筑已复旧观。

【礼拜寺】即教堂也。俄国奉希腊教，以俄帝为教主。

【西伯利亚】俄国亚洲属地之名。有铁路自俄京横贯南境，至哈尔滨而分为二支，东达海参崴，南达大连旅顺（日俄战后长春以南已属日本），计长二万余里。

【哈尔滨】清季改为双城府，在吉林西北境，俄国东清铁道之中央停车场。

【吉林奉天】均在我国东北部，合黑龙江为关东三省。

【营口】奉天省之厅名，行辽河入海之口，亦通要商埠也。

第三课 公债

本文

国家用度，大抵出于民间之赋税。其赋税之轻重，恒视国用为消息，所谓量出为入是也。虽然，国家时遇非常之事，若大战争，若大工役，而岁出骤增数倍，或至数十百倍。若遽行加赋，使所入足当所出，非特民不堪命，即令勉强输将，而百业亦因以俱败。故不得不募集公债，以应一时之急。夫公债不能不还。还之之道，又不能取给于租税。特为期较久，分年筹措，则轻而易举耳。今有中人之家。一时令出百金，必形竭蹶，若通为十年，年出十余金，斯稍易为力矣。此公债之举，所以善于加赋也。

明之季世，内乱纷起，国用不足，不得已多取于民。因之民益贫，乱益甚，国用益不足。相为因果，遂至于亡。此租税骤加之为害也。今东西各邦，岁入不足，则募集公债。其法先定募债之总额，归还之期限，利息之多少。应募者，给以证券，以为取偿之据，并许其转相买卖。时或以本国乏财，则募集于他国。凡国本巩固，信用昭著，则应募多而息轻，否则反是。英法等邦，公债虽多，而年息不过百之三四，一遇募集，应者恒逾其额。埃及土耳其之公债，年息至十之一，尚往往无有应者。此其明证也。

清之季世，所有公债，大抵募自外国。息既不轻，且多以赋税、路矿为质。议者以利不敌害为言。于是有倡募内债之举，而昭信股票，失约于民，信用益坠。今者民国成立，百端待举，所赖于公债者益亟。而整理之术，尤不可以不谨也。

目的

本课言募集公债，其法善于加赋。

准备

本课后所列之公债表，第一格为募集公债之国，第二格为各国已募集之公债数，第三格为国民每人担任之公债数。此表之作用，所以比较各国公债之多寡，及国民担任之轻重。

教授事项

(甲) 时间分配 本课分四时。

第一时 “国家用度”至“所以善于加赋也”。

第二时 “明之季世”至“此其明证也”。

第三时 “清之季世”至“尤不可以不谨也”。

第四时 复习全课。

(乙) 内容提示

一、公债之数，以法国为最多，国民之负担，亦以法国为最重。而国不患贫弱者，因募集之时，以本国为主，非借外债以为周转也。

二、以法国与中国较，中国公债之数，不及法国十分之一。国民负担之数，不及法百分之一。反日现贫弱之象者，因富民无爱国心故也（如藏金于地，贮蓄于外国银行之类是）。

三、埃及公债之数，不可谓多，然所负者皆系外债，故受英人之监督而不能自主。

四、公债而募自外国，特救一时之急，所谓治标之策而非治本之策也。谈经济者当如何保全信用，以为募内债之地步。

五、欲使国民担任公债，必注重实业，使民间家给户足，方不至有竭泽而渔之患。

(丙) 文字应用

课文为论说体，分三段。第一段首五句，言国家之赋税，当量出为人；次十三句，言国家有意外之岁出，不可遽行加赋，必募集公债；次六句，言公债有分年筹措之利；次六句，以一家作比较；次二句，申明公债善于加赋。第二段首十句，言明季骤加赋税之

害；次十句，言各国募集公债之法；次二句，言时或募集外债；次四句，言应募者之多寡，关于国家之信用；次五句，言英法等国募集公债之易；次三句，言埃及、土耳其募集公债之难；次一句，总结上文八句。第三段首六句，言清季募外债之利不敌害；次四句，言募内债而又失信；末五句，言民国欲募公债，不可不谨。

参考

【不堪命】堪，任也。不堪命，言不能任受上之命令也。

【输将】送也。

【筹措】筹，筹划也。措，措办也。

【轔蹶】困顿貌。

【季世】末世也。

【相为因果】因，原因。果，结果。相为因果云者，有内乱之原因，而生重税之结果，即有重税之原因，而生内乱之结果。

【埃及】见第一册二十七课，今为英之保护国。

【土耳其】地跨欧亚二洲，国势贫弱，为各国所挟制。

【以赋税路矿为质】赋税，如关税、盐税之类。路矿，铁路及矿产也。质，音致，以物抵押也。

【昭信股票】为中国募内债之债票，甲午中日战后，清廷因赔款巨而募以济急者，后因归偿误期准其以此项债票捐纳实官，故曰失信也。

第四课 地方自治

本文

集地方而成国。其大经大法，常合全国而统筹之，各地方均受其范围，而不敢有所畔涣，宜也。然国中诸地方，以其气候之温凉、地质之饶瘠、人口之多寡、民生之贫富、风俗之醇浇，各

有差别。则其所以待治者，亦不能不因之而差。

各地方之待治者，既不能无差，使一切受治于中央政府，以统理全国之例，干涉而整齐之，则不免于削趾适履之弊。此地方自治之制所由起也。

地方自治，非离国家而独立也。凡大经大法，属于国家之范围者，不可不听命于中央政府。若夫修筑道路，建设学校，以及卫生、慈善事业，为地方公共利害所关者，则宜任地方自谋之。

地方自治，以市乡为起点。凡一市一乡，其共同之利害，惟居民知之最深，则所以谋之者亦必最切。立宪国之制，由市、乡居民，公举议员，又由议员公推董事若干人，以管理本地方之事务。苟其所为无忤乎国法，则国家决不干涉之。此完全自治之制也。更上而县而省，则由国家设置官吏，执行政务，并由人民公举议员，以参预本地方之事务。盖官治与自治之混合制度也。

目的

本课述自治之原理，使学生知自治非离国家独立之谓。

教授事项

(甲) 时间分配 本课分三时。

第一时 “集地方而成国”至“则宜任地方自谋之”。

第二时 “地方自治”至“盖官治与自治之混合制度也”。

第三时 复习全课。

(乙) 内容提示

一、各地方之风俗人情，不能一致。施治之方针，亦不能一成不变。故以本地方人民，办本地方事业，最为相宜。

二、属国家范围者，则听命于中央政府。属省县范围者，由人民自治。是谓立宪之制度。

三、治理地方之事，无忤乎国法，方为有立宪国民程度，有自治资格，否则受人干涉，即失立法之本意。

（丙）文字应用

课文为论说体，分四段。第一段首六句，言各地方均受治于中央而不使其畔涣；次九句，言各地方之情形各有差别。第二段七句，言统理全国之制，不合于各地方，故有地方自治之制。第三段首二句，言自治非独立；次三句，言属于国家范围者，应听命于中央；次五句，言关于地方利害者，宜任地方自谋。末段首六句，言本地方之事，居民知之深而谋之切；次九句，述完全自治之制度；末六句，述官治与自治混合之制度。

参考

【经】道之常也。

【畔涣】畔，离也。涣，散也。

【醇浇】犹言厚薄也。

【差别】参差而有别也。

【削趾适履】言履小而削趾以适之，以喻事之勉强牵合也。

【忤】音五，逆也。

第五课 晏安之害

本文

动物肢体，各有其用：目以视，耳以听，足以行动，翼以飞翔，其他诸官骸，亦无不各司其职。然苟废置不用，则其性渐失，不能复如其初矣。

人家所畜之鸡鸭，其始犹野鸡野鸭也，飞翔迅疾，与凡鸟同。盖不若是，则无以求食，无以避害，而不能自存于世。人取野生之鸡鸭，喂养之，保护之。鸡鸭日处庭除，仰给于人，不虞匮乏。数十传以后，翼之功用渐失，与野生者迥异。设更放之山林中，不待终日，尽饱鹰、鹯之腹矣。